

Retrovizor: Plenum i Kindergarten



Naši najtajniji snovi su ostvareni – skupština TK jednoglasno donosi odluke u interesu građana, svojih birača a protiv svog kleptokratskog interesa. Da li je to makar i jedan bolesni optimista mogao da zamisli? Naravno da ne. Takva jednoglasja smo viđali, ali tada su se samozadovoljno povećavale plate i ko-zna-šta-sve-ne i na kritike odgovaralo, da je sve po zakonu ili lakonski-ko vas je..e. I finansijeri ovih lopovskih talova, građani, su bili takođe jedinstveni – gotovo opšti tajac. Sve su to bile jasne političke poruke jedinstva u bezdušnoj pljački.

Ovih dana vidimo isto nadrealno jednopartijsko jedinstvo taldžija iz skupštine TK, koje neodoljivo podsjeća na izraze nepodijeljene podrške i ljubavi upućene voljenom Maršalu i Partiji. Društveno-politički sadržaj i okolnosti su bile različite, ali i sada se radi o direktnoj političkoj, opakoj poruci aktualnih vlastodržaca. Svi koji žele da je razumiju glasi: “kooperativno” i jedinstveno čekamo brzodolazeće izbore, koji će, za sada, blijedi Plenum izbrisati sa političke pozornice.

Samosvijest moderatora Plenuma o njegovom kratkrajnom opstanku i političkoj odgovornosti, apsolutno se ne vidi ili ne postoji. Zaista je više degutantno i nepristojno praviti od beskrajnih, sterilnih zasjedanja Plenuma svojevrsan infantilni igrokaz tipa “kreativna radionica demokracije” i spominjati u iracionalnom kontekstu baronicu Ešton, EU izaslanika Filea ili pariški “LeMonde”. Sve to nema puno veze sa stvarnošću. Nemoguća je i kontraproduktivna, a izuzetno opasna “proizvodnja” političkih odluka u ovim “radionicama”, bez

preuzimanja direktne, iste takve, političke odgovornosti njenih aktera. Zaklanjanje iza “volje naroda” je smiješno, kao i poigravanje sa realnom stvarnošću i neupitnom, sofisticiranom organiziranošću protivničke, ujedinjene skupštinske klike. Onaj ko njih podcijeni, neće se dobro provesti, uključujući i ostali dio puka.

U tom kontekstu se može promatrati nevješta i samoubilačka mimikrijska, difuzna nakana nekih, ispod-izbornog-praga-značajnih političkih partija da zloupotrijebe i instrumentaliziraju Plenum. Ne zna se da li će se te “političke male ospice” preboljeti na vrijeme.

Osjećaj odgovornosti i realpolitički refleksi plenumskih moderatora “volje naroda”, najbolje će se vidjeti preko lakmus-papira zvanog “kritika”. Vrsta odgovora i nivo senzibilnosti reakcije, bitno će odrediti njihovu političku sudbinu. Našu, također. (Piše: Derviš ČIČKO, Tuzla LIVE, 16. februar 2014.)

Date: 31-01-2019